



## Trattativas da la suprastanza cumünala Zernez

Protocol no. 18/2017 dals 20-11-2017

Pagina 1

### Staziun Lavin – part Sagliains – approvaziun cumpra definitiva ed adöver temporari da terrain

La suprastanza ha sancziunà la cumpra definitiva dal terrain e l'adöver temporari da terrain pel fabricat da la part da Sagliains pro la staziun da Lavin.

### Reparatura da las cullineras dals cilinders illa sarinera a Susch

Las cullineras dals cilinders illa sarinera a Susch ston gnir refattas causa chi sun donnagiadas. Id es gnü deliberà il credit necessari per laschar far la reparatura e surdat l'incumenza a la firma Pro Aqua Pura AG a Zizers.

### Surtutta da parcellas da sunteri a Brail, Zernez e Susch da la Corporaziun Evangelica Zernez

La Corporaziun Evangelica Zernez/Susch ha cuntschaintamaing fusiunà cun quella da Lavin. Per chi saja reglè plü bain la situaziun dals sunteris inclus/cumprais cluchers tanter la corporaziun ed il cumün politic es gnü preparà sün dumonda e giavüsch da la Corporaziun Evangelica ün contrat da surdatta/surtutta da las parcellas correspontentas. La suprastanza ha trattà e sancziunà il sböz dal contrat correspontent a man da la Corporaziun Evangelica.

### Nouv indriz da func Polycom e renovaziun dal func intern da la Viasier Retica

Sül trarget tanter Klosters e Sagliains vain installà ün nouv indriz da func Polycom e refat l'indriz da func intern da la Viasier Retica. La suprastanza ha approvà la procedura simpla dal plan da la Viasier Retica.

### Sanaziun viaduct Val Mela –plan da proget

Tenor üna comunicaziun da la Viasier Retica vain il viaduct Val Mela sanà da marz fin in october da l'on chi vain. Il plan da proget vain tut a cognizion in sen positiv, sainza tour posizion.

### Seguonda lectüra da la ledscha cumünala da seguondas abitaziuns ed inventar d'edifizis caratteristics pel purtret da cumün

Insembel culla cumischien da planisaziun ed il planisader cumünal ha la suprastanza cumünala repassà detagliadamaing il seguond sböz da la ledscha cumünala da seguondas abitaziuns ed il sböz d'inventar d'edifizis caratteristics pel purtret da cumün. Uossa po il sböz gnir inoltrà a l'uffizi chantunal per la preexaminaziun. Id es previs da preschantar dürant il 2018 la ledscha al suveran per la votaziun a l'urna.